



Uspješno riješena talačka kriza na Aerodromu

Ovo je situacija u kojoj pokazujemo da smo u stanju i da imamo kapacitete za brz i efikasan odgovor na svaki pokušaj narušavanja bezbjednosti, kaže Mektić

Na Međunarodnom aerodromu Sarajevu jučer je održana simulacija talačke krize, u okviru pokazne vojne vježbe Brzi odgovor 2017. Prema scenariju, grupa terorista ušla je u krug Aerodroma, s namjerom da izvede teroristički akt, gdje su se zabarikadirali sa nekoliko talaca te određenom količinom oružja. Od SIPA je zatražena podrška specijalnih timova.

- Pažnja, pažnja. Okružnici ste policijskim službenicima Državne agencije za istrage i zaštitu. Predajte se mirno, povikao je službenik SIPA.

Realna situacija

Nakon što su poduzete i iscrpljene sve mjere, donesena je odluka o upadu specijalnih policijskih timova i neutralizaciji talačke situacije.

Prilikom razmjene vatre između terorista i policijskih snaga, ranjeno je nekoliko osoba u neposrednoj blizini događaja. Služba hitne medicinske pomoći ukazala je prvu pomoć, a bila je neophodna i hitna intervencija i evakuacija povrijeđenih helikopterom.

U vježbi su učestvovali jedinice EUFOR-a, Granične policije BiH, SIPA, Oružanih snaga BiH, Međunarodnog aerodroma Sarajevo, Spa-



Služba hitne medicinske pomoći ukazala je prvu pomoć

Vježba Brzi odgovor 2017. održana je i na drugim lokacijama. EUFOR sa OSBiH vježba osiguravanje skladišta municije, a na drugoj lokaciji EUFOR uvježbava evakuaciju svojih pripadnika

silračko-vatrogasna služba Aerodroma i Hitna medicinska pomoć.

Nakon vježbe, Dragan Mektić, ministar sigurnosti BiH, istakao je da su svi učesnici pokazali da su spremni da odgovore brzo i efikasno na svaku kriznu situaciju i sigurnosnu prijetnju.

- Ovo je bila jedna realistična vježba. Bila je ovo situacija da kažemo i pokažemo da smo u stanju i da imamo kapacitete da brzo i efikasno odgovorimo na svaki pokušaj narušavanja bezbjednosti u našem okruženju, kazao je Mektić.

Ministar je zahvalio EUFOR-u na saradnji i koordinaciji kroz izvođenje vježbe, ali i SIPA i Graničnoj policiji i aerodromskom osoblju, koje je, kako je kazao, vrlo ozbiljno prišlo organizaciji ove vježbe.

- Šaljemo poruku da imamo kapacitet, da imamo snage i, na kraju krajeva, odlučnost da spriječimo svaki pokušaj narušavanja bezbjednosti na bilo kojem mjestu u BiH, naglasio je Mektić.

Zapovjednik EUFOR-a, general-major Anton Waldner je kazao da su ga sve agencije koje djeluju pod nadzorom Ministarstva sigurnosti BiH impresionirale svojom reakcijom.

Izvanredna saradnja

- Dok su se agencije za provođenje zakona nosile sa situacijom unutar Aerodroma, EUFOR je provodio aktivnosti osiguravanja šireg područja aerodroma, kazao je Waldner.

Dodao je da je ova vježba pokazala i da će pokazati, s obzirom na to da će trajati do večeras, odličnu saradnju agencija za povodjenje zakona BiH i EUFOR-a.

- Ovo je prvi put da se svi zajedno uvježbavamo i mogu reći da sam jako zadovoljan, jer smo u svim fazama vježbe, od pripreme i organizacije do izvođenja, imali priliku da vidimo izvanrednu saradnju između pripadnika naših organizacija, rekao je Waldner.

EDIN BARIMAC



Ministar Mektić i general-major Waldner / DIDIER TORCHE



Upad specijalnih policijskih timova / DIDIER TORCHE